



中国经典名著

# 全唐诗

(三十八)

黄怀仁 齐思明 校正

学苑音像出版社

## 目 录

第六百九十五卷.....	1
第六百九十六卷.....	18
第六百九十七卷.....	39
第六百九十八卷.....	62
第六百九十九卷.....	79
第七百卷.....	84
第七百零一卷.....	106
第七百零二卷.....	122
第七百零三卷.....	151
第七百零五卷.....	179
第七百零六卷.....	206
第七百零七卷.....	224
第七百零八卷.....	234
第七百零九卷.....	259
第七百一十卷.....	282
第七百一十一卷.....	307

## 第六百九十五卷

章台夜思

韦庄

清瑟怨遥夜，绕弦风雨哀。孤灯闻楚角，残月下章台。  
芳草已云暮，故人殊未来。乡书不可寄，秋雁又南回。

延兴门外作

韦庄

芳草五陵道，美人金犊车。绿奔穿内水，红落过墙花。  
马足倦游客，鸟声欢酒家。王孙归去晚，宫树欲栖鸦。

刘得仁墓

韦庄

至公遗至艺，终抱至冤沈。名有诗家业，身无戚里心。  
桂和秋露滴，松带夜风吟。冥冥知春否，坟蒿日已深。



下第题青龙寺僧房

韦庄

千蹄万鞞一枝芳，要路无媒果自伤。题柱末期归蜀国，  
曳裾何处谒吴王。马嘶春陌金羁闹，鸟睡花林绣羽香。  
酒薄恨浓消不得，却将惆怅问支郎。

虢州涧东村居作

韦庄

东南骑马出郊垞，回首寒烟隔郡城。清涧涨时翘鹭喜，  
绿桑疏处哺牛鸣。儿童见少生于客，奴仆骄多倨似兄。  
试望家田还自适，满畦秋水稻苗平。

送日本国僧敬龙归

韦庄

扶桑已在渺茫中，家在扶桑东更东。  
此去与师谁共到，一船明月一帆风。



对酒

韦庄

何用岩栖隐姓名，一壶春酎可忘形。  
伯伦若有长生术，直到如今醉未醒。

尹喜宅

韦庄

荒原秋殿柏萧萧，何代风烟占寂寥。紫气已随仙仗去，  
白云空向帝乡消。濛濛暮雨春鸡唱，漠漠寒芜雪兔跳。  
欲问灵踪无处所，十洲空阔阆山遥。

途中望雨怀归

韦庄

满空寒雨漫霏霏，去路云深锁翠微。牧竖远当烟草立，  
饥禽闲傍渚田飞。谁家树压红榴折，几处篱悬白菌肥。  
对此不堪乡外思，荷蓑遥羨钓人归。



古离别

韦庄

晴烟漠漠柳毵毵，不那离情酒半酣。  
更把玉鞭云外指，断肠春色在江南。

柳谷道中作却寄

韦庄

马前红叶正纷纷，马上离情断杀魂。晓发独辞残月店，  
暮程遥宿隔云村。心如岳色留秦地，梦逐河声出禹门。  
莫怪苦吟鞭拂地，有谁倾盖待王孙。

灞陵道中作

韦庄

春桥南望水溶溶，一桁晴山倒碧峰。秦苑落花零露湿，  
灞陵新酒拨醅浓。青龙夭矫盘双阙，丹凤褰褰隔九重。  
万古行人离别地，不堪吟罢夕阳钟。



秋日早行

韦庄

上马萧萧襟袖凉，路穿禾黍绕宫墙。半山残月露华冷，  
一岸野风莲萼香。烟外驿楼红隐隐，渚边云树暗苍苍。  
行人自是心如火，兔走乌飞不觉长。

叹落花

韦庄

一夜霏微露湿烟，晓来和泪丧婵娟。不随残雪埋芳草，  
尽逐香风上舞筵。西子去时遗笑靥，谢娥行处落金钿。  
飘红堕白堪惆怅，少别秣华又隔年。

宫怨

韦庄

一辞同辇闭昭阳，耿耿寒宵禁漏长。钗上翠禽应不返，  
镜中红艳岂重芳。萤低夜色栖瑶草，水咽秋声傍粉墙。  
展转令人思蜀赋，解将惆怅感君王。



关河道中

韦庄

槐陌蝉声柳市风，驿楼高倚夕阳东。往来千里路长在，  
聚散十年人不同。但见时光流似箭，岂知天道曲如弓。  
平生志业匡尧舜，又拟沧浪学钓翁。

题盘豆驿水馆后轩

韦庄

极目晴川展画屏，地从桃塞接蒲城。滩头鹭占清波立，  
原上人侵落照耕。去雁数行天际没，孤云一点净中生。  
冯轩尽日不回首，楚水吴山无限情。

梁氏水斋

韦庄

独醉任腾腾，琴棋亦自能。卷帘山对客，开户犬迎僧。  
看蚁移苔穴，闻蛙落石层。夜窗风雨急，松外一庵灯。



曲池作

韦庄

细雨曲池滨，青袍草色新。咏诗行信马，载酒喜逢人。  
性为无机率，家因守道贫。若无诗自遣，谁奈寂寥春。

嘉会里闲居

韦庄

岂知城阙内，有地出红尘。草占一方绿，树藏千古春。  
马嘶游寺客，犬吠探花人。寂寂无钟鼓，槐行接紫宸。

夏夜

韦庄

傍水迁书榻，开襟纳夜凉。星繁愁昼热，露重觉荷香。  
蛙吹鸣还息，蛛罗灭又光。正吟秋兴赋，桐景下西墙。

早发

韦庄

早雾浓于雨，田深黍稻低。出门鸡未唱，过客马频嘶。  
树色遥藏店，泉声暗傍畦。独吟三十里，城月尚如珪。



寓言

韦庄

黄金日日销还铸，仙桂年年折又生。  
兔走乌飞如未息，路尘终见泰山平。

对雪献薛常侍

韦庄

琼林瑶树忽珊珊，急带西风下晚天。皓鹤褰褰飞不辨，  
玉山重叠冻相连。松装粉穗临窗亚，水结冰锥簇溜悬。  
门外寒光利如剑，莫推红袖诉金船。

题裴端公郊居

韦庄

暂随红旆佐藩方，高迹终期卧故乡。已近水声开涧户，  
更侵山色架书堂。蒲生岸脚青刀利，柳拂波心绿带长。  
莫夺野人樵牧兴，白云不识绣衣郎。



登咸阳县楼望雨

韦庄

乱云如兽出山前，细雨和风满渭川。  
尽日空濛无所见，雁行斜去字联联。

贵公子

韦庄

大道青楼御苑东，玉栏仙杏压枝红。金铃犬吠梧桐月，  
朱鬣马嘶杨柳风。流水带花穿巷陌，夕阳和树入帘栊。  
瑶池宴罢归来醉，笑说君王在月宫。

听赵秀才弹琴

韦庄

满匣冰泉咽又鸣，玉音闲澹入神清。巫山夜雨弦中起，  
湘水清波指下生。蜂簇野花吟细韵，蝉移高柳进残声。  
不须更奏幽兰曲，卓氏门前月正明。



观猎

韦庄

苑墙东畔欲斜晖，傍苑穿花兔正肥。公子喜逢朝罢日，  
将军夸换战时衣。鹞翻锦翅云中落，犬带金铃草上飞。  
直待四郊高鸟尽，掉鞍齐向国门归。

三堂东湖作

韦庄

满塘秋水碧泓澄，十亩菱花晚镜清。景动新桥横蝶蝶，  
岸铺芳草睡鸂鶒。蟾投夜魄当湖落，岳倒秋莲入浪生。  
何处最添诗客兴，黄昏烟雨乱蛙声。

放榜日作

韦庄

一声开鼓辟金扉，三十仙材上翠微。葛水雾中龙乍变，  
缙山烟外鹤初飞。邹阳暖艳催花发，太皞春光簇马归。  
回首便辞尘土世，彩云新换六铢衣。



寄薛先辈

韦庄

悬知回日彩衣荣，仙籍高标第一名。瑶树带风侵物冷，  
玉山和雨射人清。龙翻瀚海波涛壮，鹤出金笼燕雀惊。  
不说文章与门地，自然毛骨是公卿。

访含弘山僧不遇留题精舍

韦庄

满院桐花鸟雀喧，寂寥芳草茂芊芊。吾师正遇归山日，  
闲客空题到寺年。池竹闭门教鹤守，琴书开篋任僧传。  
人间不自寻行迹，一片孤云在碧天。

寄从兄遵

韦庄

江上秋风正钓鲈，九重天子梦翘车。不将高卧邀刘主，  
自吐清谈护汉储。沧海十年龙景断，碧云千里雁行疏。  
相逢莫话归山计，明日东封待直庐。



渔塘十六韵（在朱阳县石岩下）

韦庄

洛水分馀脉，穿岩出石棱。碧经岚气重，清带露华澄。  
莹澈通三岛，岩梧积万层。巢由应共到，刘阮想同登。  
壁峻苔如画，山昏雾似蒸。撼松衣有雪，题石砚生冰。  
路熟云中客，名留域外僧。饥猿寻落橡，斗鼠堕高藤。  
嶮树临溪亚，残莎带岸崩。持竿聊藉草，待月好垂罾。  
对景思任父，开图想不兴。晚风轻浪叠，暮雨湿烟凝。  
似泛灵槎出，如迎羽客升。仙源终不测，胜概自相仍。  
欲别诚堪恋，长归又未能。他时操史笔，为尔著良称。

冬日长安感志寄献虢州崔郎中二十韵

韦庄

帝里无成久滞淹，别家三度见新蟾。郾谿丹桂无人指，  
阮籍青襟有泪沾。溪上却思云满屋，镜中惟怕雪生髯。  
病如原宪谁能疗，蹇似刘桢岂用占。雾雨十年同隐遁，  
风雷何日振沈潜。吁嗟每被更声引，歌咏还因酒思添。  
客舍正甘愁寂寂，郡楼遥想醉恢恢。已闻铃阁悬新诏，  
即向纶闱副具瞻。济物便同川上楫，慰心还似邑中黔。



观星始觉中郎贵，问俗方知太守廉。宅后绿波栖画鹧，  
马前红袖簇丹檐。闲招好客斟香蚁，闷对琼花咏散盐。  
积冻慢封寒溜细，暮云高拔远峰尖。讼堂无事冰生印，  
水榭高吟月透帘。松下围棋期褚胤，笔头飞箭荐陶谦。  
未知匣剑何时跃，但恐铅刀不再铦。虽有远心长拥篲，  
耻将新剑学编苫。才惊素节移铜律，又见玄冥变玉签。  
百口似萍依广岸，一身如燕恋高檐。如今正困风波力，  
更向人中间宋纆。

和薛先辈见寄初秋寓怀即事之作二十韵

韦庄

玉律初移候，清风乍远襟。一声蝉到耳，千炬火然心。  
岳静云堆翠，楼高日半沉。引愁憎暮角，惊梦怯残砧。  
露白凝湘簟，风篁韵蜀琴。鸟喧从果烂，阶净任苔侵。  
柿叶添红景，槐柯减绿阴。采珠逢宝窟，阅石见瑶林。  
鲁殿铿寒玉，苔山激碎金。郾堂流桂景，陈巷集车音。  
名自张华显，词因葛亮吟。水深龙易失，天远鹤难寻。  
鉴貌宁惭乐，论才岂谢任。义心孤剑直，学海怒涛深。  
既睹文兼质，翻疑古在今。惭闻纆绿绶，即候挂朝簪。



晚树连秋坞，斜阳映暮岑。夜虫方唧唧，疲马正駸駸。  
托迹同吴燕，依仁似越禽。会随仙羽化，香蚁且同斟。

同旧韵

韦庄

大火收残暑，清光渐惹襟。谢庄千里思，张翰五湖心。  
暮角迎风急，孤钟向暝沈。露滋三径草，日动四邻砧。  
簟委班姬扇，蝉悲蔡琰琴。方愁丹桂远，已怯二毛侵。  
髡石回泉脉，移棋就竹阴。触丝蛛堕网，避隼鸟投林。  
貌愧潘郎璧，文惭吕相金。但埋酆狱气，未发爨桐音。  
静笑刘琨舞，闲思阮籍吟。野花和雨鬪，怪石入云寻。  
迹竟终非切，幽闲且自任。趋时惭艺薄，托质仰恩深。  
美价方稀古，清名已绝今。既闻留缟带，讵肯掷蓍簪。  
迟客虚高阁，迎僧出乱岑。壮心徒戚戚，逸足自駸駸。  
安羨仓中鼠，危同幕上禽。期君调鼎鼐，他日俟羊斟。

三用韵

韦庄

素律初回驭，商飙暗触襟。乍伤诗客思，还动旅人心。



蝉噪因风断，鳞游见鹭沈。笛声随晚吹，松韵激遥砧。  
地覆青袍草，窗横绿绮琴。烟霄难自致，岁月易相侵。  
涧柳横孤杙，岩藤架密阴。潇湘期钓侣，鄠杜别家林。  
遗愧虞卿璧，言依季布金。铮鏦闻郢唱，次第发巴音。  
萤影冲帘落，虫声拥砌吟。楼高思共钓，寺远想同寻。  
入夜愁难遣，逢秋恨莫任。蜗游苔径滑，鹤步翠塘深。  
莫问荣兼辱，宁论古与今。固穷怜瓮牖，感旧惜蒿簪。  
晚日舒霞绮，遥天倚黛岑。鸳鸾方翺翺，骅骝整駸駸。  
未化投陂竹，空思出谷禽。感多聊自遣，桑落且闲斟。

惊秋

韦庄

不向烟波狎钓舟，强亲文墨事儒丘。  
长安十二槐花陌，曾负秋风多少秋。

登汉高庙闲眺

韦庄

独寻仙境上高原，云雨深藏古帝坛。天畔晚峰青簇簇，

